

Na osnovu člana 14. i člana 23. Zakona o ministarskim i drugim organima uprave Tuzlanskog kantona („Službene novine Tuzlanskog kantona“, broj 17/00, 3/01, 12/03, 10/05, 3/08, 8/11 i 15/13)) i člana 3. Pravilnika o načinu pregleda umrlih, te utvrđivanja vremena i uzroka smrti („Službene novine Federacije BiH“, broj: 79/13 i 9/14), Ministarstvo zdravstva Tuzlanskog kantona d o n o s i

O D L U K U

o utvrđivanju organizacije i rada mrtvozorničke službe kojom se osigurava pregled, utvrđivanje vremena i uzroka smrti osoba umrlih izvan zdravstvene ustanove na području Tuzlanskog kantona

Član 1.

(Predmet odluke)

Ovom Odlukom utvrđuje se organizacija i rad mrtvozorničke službe kojom se osigurava pregled, utvrđivanje vremena i uzroka smrti osoba umrlih izvan zdravstvene ustanove na području Tuzlanskog kantona (u daljem tekstu: Kanton).

Član 2.

(Organizacija i rad mrtvozorničke službe)

Organizacija i rad mrtvozorničke službe podrazumjeva:

- a) imenovanje potrebnog broja osposobljenih mrtvozornika, kao i uže područje na kojem će svaki od njih obavljati pregled umrlih, cijeneći broj stanovnika i udaljenost pojedinih naselja;
- b) utvrđivanje postupka imenovanja mrtvozornika;
- c) utvrđivanje vremena na koje se mrtvozornik imenuje;
- d) vođenje evidencije imenovanih mrtvozornika na područje Kantona;
- e) osiguranje izdavanja iskaznice imenovanim mrtvozornicima čiji je oblik i forma propisan na obrascu koji je sastavni dio ove Odluke (Obrazac 1);
- f) određivanje visine naknade i osiguranje naknade za obavljanje pregleda umrlih osoba, kao i za putne troškove mrtvozornika;
- g) osiguranje dovoljnog broja obrazaca potvrde o smrti, dozvola za sahranu, knjiga evidencija o obavljenim pregledima umrlih osoba, popratnica za prevoz umrle osobe na obdukciju;
- h) pohranjivanje ovjerene knjige evidencija o obavljenim pregledima umrlih osoba;
- i) informiranje javnosti o imenovanim mrtvozornicima, te organizaciji i načinu rada mrtvozorničke službe
- j) obavještanje nadležnih matičnih ureda o imenovanim mrtvozornicima i ovlaštenim doktorima medicine na području Kantona.

Član 3.

(Obavljanje mrtvozorstva)

- (1) Pregled, utvrđivanje vremena i uzroka smrti osoba umrlih izvan zdravstvene ustanove na području Kantona obavlja doktor medicine (u daljem tekstu: mrtvozornik).
- (2) Mrtvozornik može biti doktor medicine koji ispunjava opće uslove za samostalno obavljanje liječničke djelatnosti i to da ima:
 - a) diplomu jednog od medicinskih fakulteta u Bosni i Hercegovini ili nostrificirana diploma inozemnog medicinskog fakulteta u skladu sa propisima o visokom obrazovanju,
 - b) položen stručni ispit;
 - c) državljanstvo Bosne i Hercegovine;
 - d) licencu izdata od nadležne liječničke komore
- (3) Pored općih uslova mrtvozornik mora ispunjavati i posebne uslove i to:
 - a) iskaznicu u skladu sa ovom Odlukom.
 - b) dokaz o završenoj edukaciji koja se odnosi na mrtvozorstvo
- (4) Mrtvozornik ne smije obaviti pregled umrle osobe koju je liječio neposredno prije njezine smrti.

Član 4.
(Imenovanje mrtvozornika, područje i organizacija)

(1) Mrvozornici se imenuju rješenjem Kantonalnog ministra zdravstva, za područje svake općine Tuzlanskog kantona.

(2) Organizaciju obavljanja mrtvozorstva za područje svake općine utvrđuje JZU Dom zdravlja (u daljem tekstu: Dom zdravlja) te općine, čiji je mrtvozornik zaposlenik.

Član 5.
(Mandat mrtvozornika)

(1) Mrtvozornik se imenuje na period od 2 (dvije) godine

(2) Mrtvozornik može biti razriješen dužnosti i prije proteka vremena na koje je imenovan u slučajevima utvrđenim odredbom člana 5. Pravilnika o načinu pregleda umrlih, te utvrđivanja vremena i uzroka smrti (u daljem tekstu: Pravilnik).

Član 6.
(Evidencija imenovanih mrtvozornika)

Ministarstvo zdravstva Tuzlanskog kantona (u daljem tekstu: Ministarstvo) će voditi evidenciju imenovanih mrtvozornika na području Kantona u skladu sa članom 3. stav 2. Pravilnika.

Član 7.
(Iskaznica)

Ministarstvo će svakom imenovanom mrtvozorniku izdati iskaznicu čiji je oblik i forma propisan na Obrascu 1.Pravilnika.

Član 8.
(Sredstva za rad i organizaciju mrtvozorstva)

Sredstva za rad i organizaciju pregleda osoba umrlih izvan zdravstvene ustanove na području Tuzlanskog kantona (mrtvozorstva) osigurat će se u Budžetu Tuzlanskog kantona.

Član 9.
(Iznos sredstava i način isplate)

Iznos sredstva za rad i organizaciju pregleda osoba umrlih izvan zdravstvene ustanove na području Tuzlanskog kantona (mrtvozorstva) i način isplate utvrdit će se posebnom Odlukom Kantonalnog ministra zdravstva.

Član 10.
(Izveštaj)

Mrvozornici su dužni mjesečno sačinjavati izvještaj o izvršenim pregledima sa podacima iz knjige evidencija o izvršenim pregledima umrlih osoba iz člana 23.stav 2. Pravilnika i isti dostavljati Ministarstvu i Domu zdravlja čiji je zaposlenik.

Član 11.
(Obrasci)

(1) Dom zdravlja čiji je mrtvozotrnik zaposlenik će obezbjediti prevoz i dovoljan broj propisanih Obrazaca (2.3.4.5.i 6 Pravilnika).

(2) Oblik i sadržaj obrazaca iz stava 1. ovog člana su propisani Pravilnikom.

Član 12.
(Ugovor)

Sva međusobna prava i obaveze između Ministarstva i Domova zdravlja koja proističu iz ove Odluke regulisat će se ugovorom.

Član 13.
(Pohranjivanje knjige)

Pohranjivanje ovjerene knjige evidencija o obavljenim pregledima umrlih osoba se vrši u Ministarstvu .

Član 14.
(Informisanje javnosti i obavještenje)

- (1) O imenovanim mrtvozornicima te o organizaciji i načinu rada mrtvozorničke službe Ministarstvo će informisati javnost na svojoj web stranici.
- (2) Ministarstvo je dužno sve matične urede sa područja Kantona obavestiti o imenovanim mrtvozornicima, odmah nakon imenovanja.

Član 15.
(Dužnost mrtvozornika)

Mrtvozornik je dužan da u svom radu primjenjuje Pravilnik i druge propise koji regulišu ovu oblast.

Član 16.
(Prelazne i Završne odredbe)

Dokaz iz člana 3. stav 2. tačka b) tražit će se tek nakon organizovanja edukacije u smislu člana 25. stav (5) Pravilnika.

Član 17.

Mrtvozornici imenovani u skladu sa ovom Odlukom, ukoliko u roku od 18 mjeseci od donošenja programa, odnosno 12 mjeseci od organizovanja edukacije, ne završe edukaciju, brišu se iz evidencije mrtvozornika.

Član 18.
(Stupanje na snagu i primjena Odluke)

Ova Odluka stupa na snagu danom donošenja, objavit će se u „Službenim novinama Tuzlanskog kantona“ i na web stranici Ministarstva, a primjenjivat će se od 01.01.2015.godine.

Bosna i Hercegovina
Federacija Bosne i Hercegovine
TUZLANSKI KANTON
MINISTARSTVO ZDRAVSTVA
TUZLA

MINISTAR

Broj: 13/1-37-030751/14
Tuzla, 24.12.2014.godine

Alen Kamberić

